

7-2

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst (“Službene novine Zeničko-dobojskog kantona“, broj: 7/10 i 3/23), na prijedlog Ministarstva za pravosuđe i upravu, Vlada Zeničko-dobojskog kantona, na 125. sjednici, održanoj 17.04.2026. godine, d o n o s i

## ZAKLJUČAK

### I

Prima se na znanje Izvještaj o radu Kantonalnog pravobranilaštva Zenica za period od 01.01.2025. do 31.12.2025. godine, broj: Up-9/25.

### II

Zaključak sa Izvještajem iz tačke I ovog zaključka upućuje se u dalju skupštinsku proceduru.

### III

Ovaj zaključak stupa na snagu danom donošenja.

Broj: 02- 30- 7928 /26  
Datum, 17.04.2026. godine  
Zenica

#### DOSTAVLJENO:

- 1x Ministarstvo za pravosuđe i upravu,
- 1x Stručna služba Skupštine,
- 1x Kantonalno pravobranilaštvo Zenica, putem Ministarstva,
- 1x a/a.



PREMIJER

*Mezik Pivić*

Bosna i Hercegovina  
Federacija Bosne i Hercegovine  
ZENIČKO-DOBOJSKI KANTON  
KANTONALNO  
PRAVOBRANILAŠTVO



Bosnia and Herzegovina  
Federacija Bosne i Hercegovine  
ZENICA-DOBOJ CANTON  
OFFICE OF THE ATTORNEY GENERAL

***IZVJEŠTAJ***  
***O RADU KANTONALNOG PRAVOBRANILAŠTVA ZENICA***  
***za period od 01.01.2025. do 31.12.2025. godine***

Broj: Up- 9/25  
Zenica, mart 2026. godine

Na osnovu odredbe čl. 31. Zakona o pravobranilaštvu («Službene novine Zeničko-dobojskog kantona», broj: 12/13), Kantonalno pravobranilaštvo Zenica podnosi Vladi i Skupštini Zeničko-dobojskog kantona

**IZVJEŠTAJ**  
**O RADU KANTONALNOG PRAVOBRANILAŠTVA ZENICA**  
**za period od 01.01.2025. do 31.12.2025. godine**

**I. UVOD**

Kantonalno pravobranilaštvo Zenica (u daljem tekstu: Pravobranilaštvo) je neovisan i samostalan kantonalni organ, koji preduzima mjere i pravna sredstva radi pravne zaštite imovine i imovinskih interesa Zeničko-dobojskog kantona (u daljem tekstu: Kanton).

Nadležnost i djelokrug rada Kantonalnog pravobranilaštva Zenica u odnosu na poduzimanje pravnih radnji i mjera u cilju zaštite imovine i imovinskih interesa Zeničko-dobojskog kantona, propisani su Zakonom o pravobranilaštvu («Službene novine Zeničko-dobojskog kantona», broj: 12/13), kojim je određeno da poslove zaštite imovinskih prava i interesa Kantona i njegovih organa i organizacija, te drugih organa i organizacija koji nemaju svojstvo pravnog lica, a finansiraju se iz budžeta Kantona.

Pravobranilaštvom Zeničko-dobojskog kantona rukovodi kantonalni Pravobranilac kojeg na tu funkciju imenuje Skupština Zeničko-dobojskog kantona na period od četiri godine, a zamjenjuju ga Zamjenici koje također imenuje Skupština bez ograničenja mandata.

Pravobranilac svoju funkciju obavlja samostalno u skladu sa ustavom, a na osnovu zakona, drugih propisa i općih akata.

**Nadležnosti pravobranilaštva,**

Kantonalno pravobranilaštvo Zeničko-dobojskog kantona, vrši svoju funkciju na osnovu zakona i drugih propisa, a što podrazumijeva da Pravobranilaštvo obavlja slijedeće poslove:

- kao samostalan organ, u postupku pred sudovima i drugim nadležnim organima, zastupa Kanton kao zakonski zastupnik i preduzima pravna sredstva radi zaštite imovinskih prava i interesa Kantona i kantonalnih organa u svim sudskim i upravnim postupcima,
- preduzima mjere radi pokušaja zaključenja vansudske nagodbe prije pokretanja postupka pred nadležnim sudom ili drugim organom, ili u toku pokrenutog postupka, te zaključuje sporazume o vansudskim nagodbama sa dužnicima ili povjeriocima Kantona, uz saglasnost Vlade Kantona, odnosno Komisije za predhodnu saglasnost za zaključivanje sudske i izvansudske nagodbe Vlade Kantona,
- daje mišljenja prije zaključivanja privrednih ugovora i ugovora koji regulišu imovinsko – pravna pitanja,
- daje pravna mišljenja i pruža stručnu pomoć kantonalnim organima pri rješavanju imovinsko-pravnih odnosa,

- u okviru preventivnog djelovanja, prati i proučava pojave i probleme iz oblasti vršenja svojih funkcija koje se odnose na primjenu zakona, te obavještava nadležne organe i predlaže mjere za sprečavanje društveno štetnih pojava.

Pored navedenih, Pravobranilaštvo obavlja i poslove utvrđene posebnim zakonima i drugim propisima, koji su, između ostalih, slijedeći:

- podnosi nadležnim tužilaštvima i sudovima imovinsko pravni zahtjev u skladu sa Zakonom o krivičnom postupku, nakon obavještenja od strane nadležnog suda/tužilaštva, kada je usljed krivičnog djela oštećena imovina Kantona,
- pruža stručnu pomoć organima i pravnim licima kojima je prema Zakonu o pravobranilaštvu na to ovlašteno u rješavanju imovinsko-pravnih pitanja.
- daje pravna mišljenja na dostavljene prijedloge ugovora koji regulišu imovinsko pravna pitanja, a na osnovu ovlaštenja koja su utvrđena u: Zakonu o stvarnim pravima, Zakonu o poljoprivrednom zemljištu, Zakonu o koncesijama, Zakonu o šumama, kao i drugim zakonima i propisima,
- pokreće postupak za upis stvarnih prava na nekretninama čiji je nosilac Kanton, kao i upis javnih i općih dobara, na osnovu Zakona o stvarnim pravima,
- može podnijeti žalbu protiv rješenja kojim je povrijeđen zakon u korist pojedinca ili pravnog lica a na štetu javnog interesa, u skladu sa ovlaštenjem koje mu je dato odredbama Zakona o opštem upravnom postupku,
- na osnovu Zakona o upravnim sporovima može pokrenuti upravni spor, kad je upravnim aktom povrijeđen zakon na štetu Kantona, koga Kantonalno pravobranilaštvo zastupa po zakonu, kao i u drugim slučajevima određenim zakonom, u kojem slučaju su svi organi uprave, službe za upravu i pravna lica dužni da o takvim aktima, kad za njih saznaju, obavijeste Kantonalnog pravobranioca.

U skladu sa propisanom nadležnosti Pravobranilaštva i opisu poslova nosilaca pravobranilačke funkcije, u skladu sa Zakonom, Pravobranilaštvo Kantona obezbjeđuje:

- zakonito, stručno i efikasno vršenje poslova iz svoje nadležnosti,
- ostvarivanje saradnje sa ministarstvima, kantonalnim i općinskim organima, sa organima i organizacijama na nivou Federacije BiH, sa organima pravosuđa na svim nivoima, sa pravobranilaštvima na svim nivoima, posebno radi ujednačavanja prakse i zauzimanja stavova po istim ili sličnim pravnim pitanjima,
- praćenje i proučavanje sudske prakse i zauzimanje jedinstvenih stavova na Stručnom kolegiju vezano za predmete iz nadležnosti Pravobranilaštva i drugih spornih pitanja iz svog djelokruga rada.

U 2025. godini u radu Kantonalnog pravobranilaštva Zenica evidentirano je ukupno 15.767 predmeta, koji su shodno Pravilniku o poslovanju i vođenju evidencije u Kantonalnom pravobranilaštvu Zeničko-dobojskog kantona («Službene novine Zeničko-dobojskog kantona», broj: 2/14) označeni i od kojih je:

- 466 parničnih spisa (oznaka „P“),
- 14.686 izvršna spisa od kojih je 10.562 spisa koji se odnose na neplaćenu sudsku taksu (oznaka „Ist“) i 4.124 ostalih izvršnih spisa (oznaka „I“),
- 23 upravnih spisa (oznaka „U“),
- 170 mišljenja (oznaka „M“),
- 295 raznih spisa (oznaka „R“) te
- 127 internih spisa (oznaka „Up“).

Od ukupnog broja svih predmeta u radu u 2025. godini (2.665 zaprimljenih predmeta i 13.102 nezavršenih predmeta prenesenih iz prethodne godine), u izvještajnom periodu je okončano ukupno 1.108 predmeta, dok je kao nezavršenih preneseno u narednu godinu 14.659 predmeta (od kojih se 14.032 predmeta odnosi na izvršne spise i to 10.120 za naplatu sudske takse i 3.912 za ostala prinudna izvršenja, 432 na parnične predmete i 195 ostalih predmeta).

## **II POSLOVI ZASTUPANJA**

U okviru aktivnosti na poslovima zastupanja, kao najznačajnijim poslovima iz nadležnosti Pravobranilaštva, Pravobranilaštvo je angažovano na poslovima:

- sačinjavanja tužbi Kantona protiv trećih lica i upućivanja istih nadležnim sudovima,
- izrade odgovora na zaprimljene tužbe protiv Kantona,
- ulaganju redovnih (žalbi, prigovora) i vanrednih pravnih lijekova (revizija, apelacija) protiv odluka sudova,
- uključivanja u svojstvu umješaka u sudske sporove po tužbama protiv drugih pravnih lica (osnovnih i srednjih škola radi primjene kolektivnih ugovora), te izrade odgovora tuženih na tužbe, te redovnih i vanrednih pravnih lijekova i apelacija,
- podnošenja prijedloga za izvršenje u ime Kantona i ulaganju prigovora protiv rješenja o izvršenju donesenih protiv Kantona, izradi pismenih podnesaka u toku trajanja izvršnog postupka,
- davanja pismenog odgovora na pravne lijekove druge stranke u postupku,
- zaključivanja sudskih i vansudskih nagodbi,
- podnošenja imovinsko-pravnih zahtjeva u krivičnim postupcima,
- pristupa i zastupanja na sudskim ročištima i raspravama pred organima uprave radi zastupanja interesa Kantona.

U sudskim i upravnim postupcima Pravobranilaštvo učestvuje u svojstvu stranke u postupku i dužno je da poduzima sve pravne radnje koje su potrebne radi zaštite imovinsko-pravnih interesa Kantona.

U sudskim postupcima Pravobranilaštvo se pojavljuje u ulozi zakonskog zastupnika tužitelja, tuženog ili umješaka u parničnim postupcima, (što podrazumjeva uključivanje u sporove koji se vode pred sudom između drugih pravnih lica u pravnim situacijama kada Kanton ima interes da jedna od strana u sporu uspije u postupku), te tražitelja izvršenja i izvršenika u izvršnim postupcima.

U 2025. godini u radu je bilo ukupno 15.767 parničnih, izvršnih i upravnih predmeta, a Pravobranilaštvo je zastupalo Kanton na ukupno 322 zakazanih ročišta u sudskim postupcima, pred općinskim sudovima Zeničko-dobojskog kantona, Kantonalnim sudom u Zenici, te općinskim i kantonalnim sudovima van područja Kantona.

### **PARNIČNI POSTUPAK („P“)**

U 2025. godini Pravobranilaštvo je u radu imalo 466 parničnih predmeta, od kojih je 151 zaprimljenih novih predmeta, a 315 predmeta preneseno je iz prethodne godine.

U izvještajnom periodu pravosnažno je okončano 34 parnica, a u 2026. godinu preneseno je 432 nezavršenih predmeta iz ranijeg perioda.

Pravobranilaštvo je tokom 2025. godine u ime Kantona podnijelo ukupno 23 tužbi i dalo 107 odgovora na tužbe i podneske umješača na strani osnovnih i srednjih škola, uložilo 24 žalbi na prvostepene presude i dalo 5 odgovora na žalbe suprotne strane, izjavilo 6 revizija Vrhovnom sudu Federacije BiH protiv drugostepenih odluka. Važno je napomenuti da je prema odredbama Zakona o parničnom postupku određeno da se revizija može izjaviti kad je vrijednost spora minimalno 30.000,00 KM.

Po zaprimljenim i riješenim tužbama u 2025. godini, Pravobranilaštvo je zastupalo Kanton u ukupno 151 parničnim postupcima, od kojih je

- u 23 parnica bio u ulozi tužitelja,
- u 128 parnica u ulozi tuženog.

Ukupna vrijednost svih parničnih sporova evidentiranih u izvještajnom periodu (iz ranijih godina kao i onih u izvještajnom periodu, 466 predmet) po kojima je postupano, iznosi 33.434.167,30 KM, u kojima je Kanton bio tužilac, tuženi ili umješač na strani tuženih škola. Ovdje treba napomenuti da je iskazana vrijednost ona vrijednost koja je inicijalno navedena u tužbama kao vrijednost spora koju su tužitelji opredijelili radi čega i ista nije apsolutno relevantna, naročito kad se uzme u obzir da je navedena vrijednost predmet osporavanja.

Ukupna vrijednost sporova svih podnesenih tužbi Kantona protiv trećih lica (73 parnična predmeta) iznosi 10.546.421,95 KM od čega se iznos od 2.638.218,65 KM odnosi na podnesene tužbe u 2025. godini, (23 tužbe), a iznos od 7.908.203,30 KM se odnosi na ukupnu vrijednost tužbi iz ranijih godina (50 tužbi) od čega je 6 predmeta pravosnažno okončano čija je ukupno dosuđena vrijednosti u korist Kantona, iznosi 92.460,16 KM.

Ukupna vrijednost sporova svih podnesenih tužbi protiv Kantona (393 parnična predmeta) iznosi 22.887.745,35 KM od čega se iznos od 3.213.741,53 KM odnosi na zaprimljene tužbe u 2025. godini, (128 tužbi), a iznos od 19.674.003,82 KM se odnosi na ukupnu vrijednost tužbi iz ranijih godina (265 od čega 135 predmeta su u operativnom radu dok je 130 predmeta u predarhivi odnosno u evudenciji jer nisu još uvijek pokrenuti, iz nekog razloga, postupci izvršenja od strane tražitelja izvršenja protiv Kantona).

Od ukupnog broja okončanih predmeta u izvještajnom periodu (34 predmeta) u ukupnom iznosu od 1.191.972,00 KM, iznos od 464.089,85 KM se odnosi na pravosnažno dosuđene i okončane tužbe protiv Kantona (27 tužbi, 6 tužbi odbijeno za iznos od 249.683,33 KM, 5 tužbi povučeno za iznos od 385.768,70 KM), a iznos od 92.430,16 KM se odnosi na pravosnažno dosuđene i okončane tužbe u korist Kantona (7 tužbe).

<i>Vrijednost svih parničnih sporova</i>	<i>Vrijednost tužbi Kantona protiv trećih lica</i>	<i>Vrijednost svih tužbi protiv Kantona</i>	<i>Vrijednost svih okončanih tužbi</i>	<i>Vrijednost dosuđenih tužbi protiv Kantona</i>	<i>Vrijednost dosuđenih tužbi u korist Kantona</i>
33.434.167,30KM	2.638.218,65 KM	22.887.745,35 KM	1.191.972,00KM	464.089,85 KM	92.430,16 KM

Tokom 2025. godine u redovnom parničnom postupku, pravosnažno je okončano 27 predmeta po tužbama protiv Kantona, kojima je utuženo ukupno 1.191.972,00 KM, radi potraživanja po raznim osnovama (dug, naknada štete, prava iz radnog odnosa i dr.), a dosuđeno je ukupno 464.089,85 KM, (usvojeno je 5 tužbi u cijelosti, 6 tužbi povučeno, 10 tužbe riješene na drugi način i 6 tužbe je u cijelosti odbijeno za utuženi iznos od 249.683,33 KM).

<i>Pravosnažno okončano</i>	<i>Vrijednost pravosnažno okončanih predmeta</i>	<i>Vrijednost pravosnažno dosuđenih tužbi</i>	<i>Vrijednost povučenih/ i riješenih na drugi način</i>	<i>Vrijednost pravosnažno odbijenih tužbi</i>	<i>Uspjeh tužitelja u sporu</i>
28 predmeta	1.191.972,60 KM	464.089,85 KM	385.768,70 KM	249.683,33 KM	39 %

Po tužbama Kantona okončano je 6 predmeta, u kojima je utuženo ukupno 92.460,16 KM, i iznos je u cijelosti dosuđen u korist Kantona.

<i>Pravosnažno okončane tužbe Kantona</i>	<i>Vrijednost spora po tužbama Kantona</i>	<i>Usvojene u cijelosti tužbe Kantona</i>	<i>Vrijednost dosuđenih tužbi u korist Kantona</i>	<i>Vrijednost sudske nagodbe u korist Kantona</i>	<i>Uspjeh tužitelja u sporu</i>
6 tužbi	92.460,33 KM	6 tužbi	92.460,33 KM		100 %

Od ukupno 34 pravosnažno okončanih predmeta u 2025. godini

- po tužbama protiv Kantona, dosuđeno je ukupno 464.089,85 KM (sporovi se odnose na naknade po osnovu kolektivnih ugovora, škola, uprave, MUP i pravosuđe, ugovorene i regresne dugove, naknade šteta, naknade iz radnog odnosa, imovinska prava),
- u korist Kantona dosuđeno je ukupno 92.460,33 KM, bilo da su usvojeni tužbeni zahtjevi Kantona ili su tužitelji odbijeni u cijelosti ili djelimično sa tužbenim zahtjevom ili je došlo do povlačenja tužbi od strane tužitelja ili je postupak okončan na drugi način (odbacivanjem tužbe, prekid postupka i sl.).

Povlačenjem tužbi u 2025. godini okončano je ukupno 6 predmet, ukupne vrijednosti spora 122.517,56 KM, a odnosi se na naknadu štete i ispunjenje ugovornih obaveza.

<i>Pravosnažno okončanih u 2025. godini</i>	<i>Pravosnažno okončanih tužbi-Kanton tuženi</i>	<i>Pravosnažno okončanih tužbi-Kanton tužitelj</i>	<i>Vrijednost pravosnažno dosuđenih tužbi na štetu Kantona</i>	<i>Vrijednost pravosnažno odbijenih tužbi prema Kantonu</i>	<i>Vrijednost pravosnažno dosuđenih tužbu u korist Kantona</i>
34 tužbi	27 tužbi	6 tužbi	464.089,85 KM	249.683,33 KM	92.460,33 KM

### **Sporovi za naknadu štete (materijalne i nematerijalne)**

*U strukturi sporova za naknadu štete najznačajniji su sporovi zbog štete nastale neizvršenjem zakonskih i ugovornih obaveza, a najbrojniji su sporovi za štete nastale zbog šumske krađe, zatim štete na vozilu učesnika u saobraćaju zbog neadekvatnog održavanja puteva iz nadležnosti Kantona, štete zbog povreda na radu, štete nastale zbog nepropisnog postupanja državnih organa, a naročito u izvještajnom periodu su aktuelne tužbe za zaštitu od diskriminacije i dr.*

*Iz ove grupacije sporova, Pravobranilaštvo je u 2025. godini zastupalo Kanton u 46 predmetu (ukupna v.s. 897.133,69 KM), od kojih su:*

- 9 tužbi zaprimljenih u toku godine ukupne vrijednosti spora od 885.089,18 KM u kojem je Kanton tuženi.*
- 7 predmeta je okončano u 2025. godini ukupne vrijednosti sporova od 246.677,45 KM u kojim je Kanton bio tuženi.*

*Od ukupno 7 tužbi podnesenih protiv Kantona za naknadu štete koje su bile u radu u izvještajnom periodu nije usvojena niti jedna tužba od čega su dvije povučene tužbe dok je u ostalim tužbeni zahtjev u cijelosti odbijen, dakle, radi se o tužbama iz ranijih godina.*

*Tužbi protiv Kantona zaprimljenim u 2025. godini koje se odnose na potraživanja naknade materijalne i nematerijalne štete zbog propusta u postupanju organa uprave, bilo je 40 tužbi u ukupnoj vrijednosti od 201.897,41 KM, naknadu štete nastalu u saobraćaju, dok nije bilo tužbi zbog napada životinja.*

### **Štete zbog neizvršenja ugovornih i zakonskih obaveza**

*U ovoj grupaciji sporova prisutni su privredni sporovi koji proizilaze iz raznih pravnih odnosa Kantona sa drugim pravnim subjektima, i to najčešće radi naplate dospjelih, a nenaplaćenih obaveza koje proizilaze iz zakona, koncesionih ugovora, ugovora o kreditima, ugovora o raznim vrstama usluga, te kupoprodajnih ugovora po kojima nisu ispoštovani ugovoreni rokovi za plaćanje ugovorenih naknada. U ovim predmetima, kada dug nije sporan, u većini slučajeva dužnik izmiri dug prije nego što se zakaže rasprava po tužbi, u kojem slučaju tužitelj povlači tužbu.*

*U izvještajnom periodu Pravobranilaštvo je u ime Kantona podnijelo 2 tužbe radi ispunjenja ugovora, ukupne vrijednosti od 2.200.049,07 KM a koje se odnose na Ugovorene obaveze iz ugovora o koncesiji.*

*Pravobranilaštvo smatra da je na ovom mjestu, kad su u pitanju zakonske i druge ugovorne obaveze, potrebno obrazložiti predmet po tužbi „Džananović transport“ D.O.O. Zenica, protiv tuženih Federacija BiH i Zeničko-dobojski kanton, radi isplate, vrijednost spora, 103.980,00 KM. U predmetnoj pravnoj stvari radi se o zahtjevu tužitelja za isplatom naknade za troškove smještaja lica shodno Zakonu o zaštiti stanovništva od zaraznih bolesti („Sl. novine Federacije BiH“, broj: 29/05), (smještaj lica oboljelih od COVID-a), koji troškovi, prema citiranom zakonu padaju na teret budžeta Federacije BiH.*

*U prvostepenom i drugostepenom postupku, tužba tužitelja u odnosu na Zeničko-dobojski kanton je odbijena, međutim, u revizijskom postupku Vrhovni sud Federacije BiH, usvojio je reviziju tužitelja kojom je obavezao Zeničko-dobojski kanton da tužitelju isplati*

103.980,00 KM, zajedno sa zakonskom zateznom kamatom počev od 28.01.2022.god. pa do isplate i naknadi troškove postupka u iznosu od 7.702,11 KM.

Ovdje valja navesti da je odlučna činjenica bila ta što je Federacija BiH izvršila prenos novčanog iznosa na budžet Kantona, a da Kanton nije izvršio taj prenos pružiocima usluga za smještaj lica oboljelih od COVID-a.

U tom smislu dovoljno je citirati navod iz odluke Vrhovnog suda Federacije BiH, strana 5.pasus prvi, .."Proizilazi da u ovoj pravnoj situaciji jedini koji svoju obavezu (prosljeđivanje uplate novca) nije izvršio jeste 1.tuženi (Kanton), zbog čega je u odnosu na 1.tuženog (Kanton)jedino osnovan tužbeni zahtjev".

Također tužitelj je u ovoj pravnoj stvari nudio Kantonu zaključenje vansudskog poravnjanja na iznos glavnice, na šta Kanton nije pristao iz kojeg razloga će u konačnom pored glavnice imati obavezu plaćanja i sporednih potraživanja (kamate i troškovi postupka) koja nisu zanemariva, na šta Pravobranilaštvo nije u mogućnosti uticati.

### **Štete proistekle iz šumske krađe**

U toku 2025. godine Pravobranilaštvo je podnosilo tužbe za naknadu štete zbog šumske krađe, a iste se podnose prema zahtjevima dostavljenim od strane Kantonalne uprave za šumarstvo za pokretanje postupaka za utuženje, te kako je bilo dostavljenih zahtjeva po ovom osnovu, Pravobranilaštvo je podnijelo ukupno 17 tužbi u ukupnoj vrijednosti sporova od 3.056,67 KM.

Po podnesenim tužbama radi duga za izvršenu šumsku krađu, u 2025. godini okončano je 4 tužbe.

### **Štete nastale u saobraćaju**

Kako je Kanton odgovoran za bezbjedno odvijanje saobraćaja na cestama kojim upravlja, (Regionalne ceste- član 13. Zakona o cestama Federacije BiH („Sl.novine Federacije BiH“, broj: 12/10 i 16/10) tužbe za štete nastale u saobraćaju najčešće se podnose za štete nastale zbog neadekvatnog održavanja cesta i objekata na istim, ne postavljanja odgovarajućih znakova upozorenja, odrona kamena na cestama i sl. (urušavanje mosta, oštećenje objekta uslijed rekonstrukcije puta, saobraćajne nesreće uslijed oštećenja puta, te drugi uzroci nastanka šteta na vozilu).

Po tužbama protiv Kantona iz ranijih godina, po ovom osnovu u 2025. godini pravosnažno je okončano 3 parnice u ukupnoj vrijednosti od 13.014,37 KM.

### **Štete pričinjene trećim licima od strane organa ili uposlenika Kantona**

Za štetu koju trećem licu u vršenju ili u vezi sa vršenjem svojih funkcija prouzrokuje kantonalni organ ili uposlenik Kantona, odgovara Kanton, kao pravno lice.

U toku 2025. godine nije bilo tužbi podnesenih protiv Kantona za naknadu šteta po ovom osnovu odnosno radi naknade materijalne štete zbog propusta u postupanju organa uprave Zeničko-dobojskog kantona.

### **Štete nastale na radu ili u vezi sa radom**

U izvještajnom periodu, po ovom osnovu, podneseno je ukupno 6 tužbi radi naknade štete zbog povrede na radu u ukupnom iznosu od 21.676,00 KM.

### Sporovi radno-pravnog karaktera

U 2025. godini Pravobranilaštvo je zastupalo Kanton (kao tuženog i kao umješaka na strani tuženog) u 88 sudskih sporova radno-pravnog karaktera.

Shodno odredbi iz člana 11. stav (5) Zakona o pravobranilaštvo, Pravobranilaštvo ne zastupa organe i tijela Kantona u radnim sporovima već to vrši osoba zaposlena u organu ili tijelu Kantona koju odredi rukovodilac organa, izuzev radnih sporova pokrenutih radi novčanog potraživanja. Bitno je navesti da Pravobranilaštvo ima određenih problema kad je u pitanju praksa sudova u primjeni navedene odredbe, odnosno po pitanju šta je radni spor, obzirom da je stav Pravobranilaštva da je predmet citirane odredbe svaki radni spor koji za predmet ima određeno utvrđenje prava iz radnog odnosa, neovisno što je uz takav zahtjev postavljen i zahtjev za novčano potraživanja. Ovo naročito iz razloga što je zahtjev za novčanim potraživanjem uslovljen zahtjevom za utvrđenjem određenog prava iz radnog odnosa. Stoga smatramo da Pravobranilaštvo ima ispravan stav po pitanju primjene citirane odredbe, naročito što su to sporovi po svojoj pravnoj prirodi upravo proistekli iz određenog postupanja ili ne postupanja organa uprave u pogledu prava iz radnog odnosa uposlenika Kantona.

### Sporovi radi isplate razlike plaća i naknada po Kolektivnim ugovorima

Radi isplate razlika plaća i drugih naknada primjenom Kolektivnog ugovora za djelatnost osnovnog obrazovanja u Federaciji BiH, u 2025. godini protiv osnovnih škola i srednjih škola sa područja Kantona podneseno 48 novih tužbi čija je ukupna vrijednost 777.375,53 KM. U podnesenim tužbama uposlenika osnovnih škola, radi se o potraživanjima razlike doprinosa za penzijsko osiguranje i to proisteklih iz već presuđenih potraživanja za razlike plaća po tada važećem Kolektivnom ugovoru.

Kako je sudska praksa već zauzela pravni stav po ovom pitanju, nema nikakvog pravnog osnova za osporavanje, jer je Pravobranilaštvo već iscrpilo sva pravna sredstva u tom smislu, predlagali smo i drugačiji način rješavanja ovakve vrste parnica, kako bi se makar izbjegli sudski troškovi.

Ovdje je važno napomenuti da je škola kao pravni subjekat označena kao tužena, te da pravobranilaštvo ima samo pravni položaj umješaka na strani škole. Također, pravobranilaštvo se uključuje u postupke samo nakon što tužena škola dostavi tužbu, te je primijećeno da škole to rade apsolutno neažurno, radi čega ovo Pravobranilaštvo i nema saznanja o broju postupaka protiv škola sa područja Zeničko-dobojskog kantona, radi čega smo iznijeli podatke kojima u našem upisniku raspolažemo.

U toku 2025. godine podneseno je 10 tužbi protiv Kantona, radi isplate razlika plaća i drugih naknada na osnovu Kolektivnog ugovora za službenike organa uprave i sudske vlasti u Federaciji BiH, naknade za doprinose i prevoz, ukupne vrijednosti 126.718,11 KM, a koje se odnose na potraživanja Ministarstva unutrašnjih poslova.

U toku 2025. godine podneseno je 28 tužbi i to tužitelja Kantonalnog tužilaštva Zeničko-dobojskog kantona i sudija Općinskog suda u Zenici a radi diskriminacije u pogledu ostvarivanja određenih prava koja proističu iz Zakona o plaćama i naknadama sudija i tužilaca odnosno naknada koje su utvrđene Odlukama Zeničko-dobojskog kantona, na osnovu tog Zakona.

Zakonom o izmjenama i dopunama zakona o plaćama i drugim naknadama sudija i tužilaca u Federaciji Bosne i Hercegovine BiH", br. 72/05, 22/09, 27/12 - odluka US, 55/13, 102/13 - autentično tumačenje, 55/17 - odluka Ustavnog Suda i 61/22) u članu 6a propisano je da:

(1) Sudijama u općinskom i kantonalnom sudu i tužiocima u kantonalnom tužilaštvu pripada naknada temeljem vremena provedenog u obaveznom dežurstvu ili pripravnosti za rad

srazmjerno vremenu trajanja obaveznog dežurstva ili pripravnosti za rad. (2) Visinu, uvjete i način ostvarivanja naknade iz stava (1) ovog člana utvrdit će nadležne vlade kantona posebnim propisom."

Kantonalno pravobranilaštvo je u ovim postupcima tek revizijama kod Vrhovnog suda Federacije BiH uspjelo osporiti odluke nižestepenih, Općinskih i Kantonalnog suda u Zenici, i to u pogledu visine tužbenog zahtjeva na način da je visina istog smanjena za 10 puta u odnosu na dosuđeni iznos kako su to dosuđivali nižestepeni sudovi.

Po tužbama radi isplate razlike plaća i naknada na osnovu dežure i pripravnosi sudija Općinskih i Kantonalnog suda u Zenici, u izvještajnom periodu pravosnažno je riješeno 3 predmeta, kojima je potraživano 13.825,06 KM a dosuđeno je ukupan iznos od 11.272,73 KM i troškova 4.072,62 KM.

Po tužbama radi isplate razlike plaća i naknada na osnovu prekovremenog rada, rada u neradne dane, dane praznika, a koji se odnosi na uposlenike MUP-a, izvještajnom periodu pravosnažno je riješeno 2 predmeta, kojima je potraživano 13.095,00 KM a dosuđeno je ukupan iznos od 32.109,18 KM i troškova 6.259,50 KM.

U ovom dijelu izvještaja za period za koji se daje izvještaj, ali se opisana pojava proteže unazad u radu ovog organa, a prema svim pokazateljima i u buduću, pa smatramo potrebni posebno dati svoj osvrt u okviru, između ostalog, preventivne djelatnosti Pravobranilaštva shodno Zakonu o pravobranilaštvu, u cilju zaštite imovine i imovinskih interesa Kantona u cijelini.

Naime, kako se može zaključiti, a čime smo se i rukovodili kod izvođenja ovog zaključka, pretežan dio rada na poslovima parničnog postupka zauzimaju tužbe uposlenika Kantona (tu se misli i na uposlenike škola) i onih koji se finansiraju iz budžeta Kantona (sudije i tužioci) i koji prema iznesenim podacima ta svoja prava iz radnog odnosa sa više ili manje uspjeha i ostvaruju. Ovo za posljedicu ima da Kanton gubi sporove, jer su takve prirode da sud utvrdi povrede prava iz radnog odnosa po određenim osnovama, prije svega, ne donošenjem propisa na osnovu koji uposlenici Kantona imaju pravo na naknade plaće.

Dakle, Pravobranilaštvo kao zakonski zastupnik, u tim postupcima samo u određenoj mjeri može uticati, eventualno na prigovore materijalno pravne i procesne prirode, smanjenja visine tužbenog zahtjeva a skoro nikako na pravni osnov tužbe, jer je isti u direktnoj vezi sa izričitom primjenom propisa kojeg se poslodavac (Kanton) nije pridržavao, ili i ne donošenje obaveznog provedbenog propisa na osnovu kojeg uposlenici (ili oni koji se finansiraju iz budžeta) ostvaruju svoja prava u parničnim postupcima.

Iz navedenih razloga a radi suzbijanja ove konstantne pojave koja opterećuje rad Pravobranilaštva sugeriramo da Kanton prati dosljednu primjenu propisa kao i onih donesenih od strane Federacije BiH a u direktnoj su vezi sa obavezama Kantona, kako bi se smanjio broj postupaka ove vrste a time i nepotrebno opterećivao budžet izvršenjem takvih odluka koje u konačnom podrazumijevaju i sporedna potraživanja.

Po tužbama radi isplate plaća i naknada na osnovu granskih kolektivnih ugovora u izvještajnom periodu pravosnažno je riješeno 14 predmeta, kojima je potraživano 271.343,73 KM a dosuđeno je ukupan iznos od 265.083,72 KM i troškova 26.358,40 KM. To se odnosi na tužbe kojom su prvobitno provedeni postupci za isplatu razlike plaća prema odredbama Kolektivnog ugovora za osnovno obrazovanje, ali su sad predmet tužbi razlike za penzijsko osiguranje koje prvobitno nisu traženi, a stav suda je da nisu predmet zastare!

## Ostali sporovi

U 2025. godini Pravobranilaštvo je imalo u radu 10 tužbe koje se odnose na utvrđivanje prava vlasništva, utvrđivanje prava ništavosti ugovora, mjere osiguranja tužba koja se odnosi na regresno potraživanje.

## **IZVRŠNI POSTUPAK („I“)**

Tokom 2025. godine u radu Pravobranilaštva evidentirano je ukupno 14.686 izvršna predmeta (10.562 predmeta radi naplate sudske takse /„Ist“/ i 4.124 ostala izvršna predmeta /“I“/), od kojih je 12.582 preneseno iz predhodne godine.

U izvještajnom periodu zaprimljeno je 2.104 nova izvršna predmeta (157 radi prinudne naplate pravosnažno dosuđenih potraživanja iz rješenja za šumsku štetu i 1.947 radi prinudne naplate sudske takse), pravosnažno je okončano 654 predmeta, dok je 14.032 nezavršenih predmeta preneseno u narednu godinu.

Od ukupno 2.104 zaprimljena izvršna predmeta u izvještajnom periodu, 1.947 predmeta se odnose na prijedloge za izvršenje, koje je u 2025. godini u ime Kantona, Pravobranilaštvo podnijelo nadležnim sudovima, koji se odnose na prinudnu naplatu neplaćene sudske takse i 110 prijedloga za prinudnu naplatu duga po osnovu ugovora o koncesiji, duga za štete nastale izvršenom šumskom krađom, preužitka za egzistencionalne boračke naknade te neplaćene troškove parničnog i izvršnog postupka, koji su dosuđeni u korist Kantona, 47 predmeta se odnosi na prijedloge za izvršenje za prinudnu naplatu duga, koji su podneseni protiv Kantona, radi naplate dosuđenih naknada na osnovu pravosnažnih presuda (u pretežnom dijelu izvršenje po presudama po osnovu duga troškova parničnog postupka). Smatramo potrebnim napomenuti da je u ovom dijelu pravobranilaštvo aktuelno učestvovalo u pružanju stručne pomoći u postupcima, ukupno 47 postupaka u kojim je škola označena kao izvršenik u svim dostavljenim rješenjima od strane škola koje su dostavljale rješenja i tražile stručnu pomoć.

Od ukupnog broja 14.686 izvršnih predmeta u radu u 2025. godini, Kanton je tražilac izvršenja u 13.813 predmeta dok je u 871 predmeta Kanton izvršenik.

Od ukupno 14.686 izvršnih predmeta, koji su bili u radu u toku 2025. godine, donošenjem rješenja o izvršenju okončano je ukupno 654 predmeta, od kojih se 442 predmeta odnosi na sudske takse, a 212 predmeta na ostala izvršenja. Po osnovu neplaćene sudske takse i ostalih izvršenja po raznim osnovama u toku 2025. godine u korist Kantona je realizovano ukupno 176.476,00 KM.

U toku 2025. godine u svim okončanim parničnim i izvršnim postupcima, na ime naknade i nagrade za rad (zastupanje) Kantonalnog pravobranilaštva, koji predstavljaju troškove postupka, u korist Kantona, ukupno je dosuđeno 34.485,00 KM od čega iznos 11.978,00 KM se odnosi na dosuđene troškove u parničnom a 22.507,00 KM na troškove u izvršnom postupku.

Ova sredstva se uplaćuju direktno u Budžet Kantona i ista nisu predviđena stavkom "prihodi budžeta", jer se ista dosuđuju za rad Pravobranilaštva na osnovu odredaba Zakona o parničnom postupku prema advokatskoj tarifi, kada Pravobranilaštvo u potpunosti ili djelimično uspije u sporu, pa slijedi da su ista doprinos Kantonalnog pravobranilaštva Budžetu Kantona.

<i>Ukupno u radu</i>	<i>Pravosnažno okončano i naplaćeno sa troškovima</i>	<i>Sudske takse „Ist“</i>	<i>Ostali izvršni predmeti“ I“</i>	<i>Prenesen o iz prethodne godine</i>	<i>Zaprimljen o izvještajnom periodu</i>	<i>Prenesen o narednu godinu</i>
14.686	654	10.562	4.124	12.572	2.104	14.032
<i>Vrijednos</i>	<i>198.983,00 KM</i>	<i>123.124,25KM</i>	<i>53.351,65 KM</i>			

*Kad je u pitanju ukupna vrijednost ostvarenog prihoda u budžet Kantona po ovome osnovu, bitno je napomenuti da u izvještajnom periodu u Kantonalnom pravobranilaštvu je nedostajao jedan izvršilac, Zamjenik i stručni saradnik, te je i pored navedenog ostvaren itekako pozitivan rezultat u svakom segmentu rada Pravobranilaštva naročitim zalaganjem svih postojećih uposlenika i zamjenika Pravobranilaštva.*

*Izvršni postupci, u kojima se Kanton pojavljuje u ulozi tražioca izvršenja, odnose se na izvršni postupak pokrenut protiv lica koja ne vraćaju kredite dobijene iz budžetskih sredstava, lica za koja je utvrđeno u krivičnim i prekršajnim postupcima da su odgovorni za šumsku krađu, lica koja nisu po rješenju suda platili sudsku taksu i prijedlozi protiv pravnih i fizičkih lica, koja nisu platila obaveze dosuđene Kantonu pravosnažnim presudama.*

*U okviru preventivnog djelovanja, prije pokretanja izvršnog postupka, Pravobranilaštvo je upućivanjem pismenih opomena dužnicima u većem broju predmeta uspjelo da obezbijedi plaćanje sudske takse bez podnošenja prijedloga za izvršenje.*

*Prijedlozi za izvršenje koji se podnose u ime Kantona, odnose se uglavnom na prinudnu naplatu sudske takse koja nije plaćena dobrovoljno u vođenim parničnim postupcima pred općinskim sudovima u Kantonu, koje su određene rješenjem sudova. U toku trajanja izvršnog postupka do konačne naplate duga i dalje su prisutni problemi koji se odnose na ispravnu oznaku naziva i adrese izvršenika i na statusne promjene izvršenika, što je od uticaja na dužinu i ishod samog izvršnog postupka. A također su izvršenja po prijedlogu Kantona u većem broju slučajeva otežana i iz razloga što su računi izvršenika često blokirani ili ugašeni, odnosno što izvršenik-fizičko lice nema nikakve imovine na kojoj bi se moglo provesti izvršenje.*

*Također, Pravobranilaštvo se dostavljaju rješenja za plaćanje sudske takse u kojima je takseni obveznik strano pravno lice, odnosno fizičko lice koje ima prijavljeno prebivalište van teritorije Bosne i Hercegovine. U tom slučaju jedini način za naplatu sudske takse je provođenje postupka izvršenja u zemlji u kojoj pravno lice ima sjedište, odnosno fizičko lice boravište, na način da je potrebno postupiti prema pravnom pravilu „Lex rei siti“, odnosno prema pravilima domaćeg prava. Ovakav postupak nije svrsishodan jer podrazumijeva prethodno predujmljivanje troškova koji su najčešće nesrazmjerni u odnosu na glavno potraživanje. U tom smislu je od značaja uloga nadležnih sudova koji odlučuju u postupcima i utvrđuju taksu da vode računa o taksenom obvezniku, da li se radi o stranoj pravnoj ili fizičkoj osobi, jer u dosadašnjoj praksi takva potraživanja ostaju ne naplaćena jer su predmet složene procedure povezane sa nesrazmjernim troškovima.*

*Pravobranilaštvo je u izvještajnom periodu, kao i u ranijem periodu, od strane Općinskog suda u Zenici zaprimilo veliki broj predmeta koji se odnose na prinudnu naplatu sudske takse za dužnika RMU „Zenica“ D.O.O. Zenica. Neovisno od činjenice, da je Vlada Federacije BiH, donijela Odluku o finansijskoj konsolidaciji RMU „Zenica“ D.O.O. Zenica, broj: 493/2024 od 02.04.2025.god. na temelju koje Općinski sud u Zenici odbacuje prijedloge*

za izvršenje podnešene od strane Kantonalnog pravobranilaštva kao nedozvoljene, odnosno, prinudna naplata sudske takse prema stavu suda a na osnovu gore nevedne Odluke je nedopuštena.

Ovo posebno naglašavamo jer se radi o velikom broju predmeta zaprimljenih u izvještajnom periodu, oko 800 predmeta, koje Općinski sud u Zenici i dalje dostavlja Pravobranilaštvu radi prinudne naplate iako naš zahtjev/predlog za prinudnu naplatu odbacuje!

Smatramo posebno naglasiti, da kad je u pitanju ova problematika, odnosno dostavljanje rješenja od strane Općinskog suda u Zenici, rješenja u kojim je takseni obveznik pravno lice, da Pravobranilaštvo ne pokreće postupke prinudne naplate sudske takse. Naime, pokretanje postupaka prinudne naplate protiv izvršenika koji je strano pravno lice, odnosno sjedište je u inostranstvu, pokretanje takvih postupaka je povezano sa izrazito komplikovanom procedurom koja je dalje povezana sa prethodnim troškovima a dok je naplata glavnog duga neizvjesna.

Naime, shodno Zakonu o sudskim taksama Zeničko-dobojskog kantona („Službene novine Zeničko-dobojskog kantona“, broj: 1/16 - prečišćen tekst), taksa se uplaćuje prilikom podnošenja pismena nadležnom sudu. Međutim, u praksi to i nije tako radi čega i postoji ogroman broj rješenja koja se dostavljaju Kantonalnom pravobranilaštvu radi pokretanja postupka. Ovaj problem naročito dolazi do izražaja, kako smo rekli, kad je takseni obveznik strano pravno lice, ili fizičko lice koje ima prebivalište u inostranstvu. U takvim slučajevima Pravobranilaštvo vraća nadležnom sudu rješenja jer je propušteno da se postupi po Zakonu o sudskim taksama, odnosno da u ovakvim pravnim stvarima, sud zahtjeva plaćanje takse prilikom poduzimanja radnje od strane pravnog lica koje ima sjedište izvan Bosne i Hercegovine.

Napominjemo, da su takva pravna lica uglavnom strane u privrednim parničnim postupcima, gdje su vrijednosti postupak samim time i veći, te primjenom Tarife i sudska taksa predstavlja velike iznose a koji u konačnom ne mogu biti predmet prinudne naplate. Postupajući sudovi ne vode naročito računa da je to prihod Kantona koji se u konačnom, prema budžetskoj raspodjeli, vraća na određen način tom sudu, jer smatraju to sporednom stvari, dok u slučaju donošenjem rješenja o obavezi plaćanja sudske takse, tako potraživanje postaje glavni dug. Na ovaj način se ponovo pokreće izvršni postupak, time izravno otvaraju predmeti izvršenja, kako u Pravobranilaštvu tako i nadležnim sudovima, dok bi, smatramo, većim angažmanom postupajućeg suda u cilju naplate sudske takse kako to i predviđa Zakon o sudskim taksama, taj broj predmeta bio manji, a direktna naplata veća.

Također određeni problem se pojavljuje i kad je u pitanju nakanada i nagrada za rad Pravobranilaštva koje prema odredbama Zakona o parničnom postupku (član 395.stav(1) Odredbe o troškovima primjenjuju se i na stranke koje zastupa javno pravobranilaštvo. (2) U tom slučaju troškovi postupka obuhvataju i iznos koji bi se stranci priznao na ime nagrade advokatu.), a naročito u radnjama koje se odnose na izvršni postupak.

Naime pretežan dio pokrenutih izvršnih postupaka se odnosi na neplaćene sudske takse kao i naknade štete za šumsku krađu, gdje su iznosi glavnog duga manji (iznosi se kreću od 20,00 KM pa do 100,00 KM), radi čega smatramo, a cijeneći sveukupnu situaciju, da odstupamo od primjene Tarife za o nagradama i naknadama troškova za rad advokata F BiH ("Sl.novine Federacije Bosne i Hercegovine", broj: 43/25) radi čega zahtjevamo stvarne materijalne troškove koji su prihod budžeta Kantona. (ilustracije radi, za iznos potraživanja od 0,00 -5.000,00 KM, troškovi bi iznosili 448,00 KM za jednu radnju prema članu 15. Adv.tarife koji za gore navedeno novčano potraživanje iznosi 80 bodova, koji se množi sa vrijednosti boda koja za 2025.god. iznosi 5,60 KM).

## **UPRAVNI POSTUPAK („U“)**

*Tokom 2025. godine Pravobranilaštvo je u radu imalo 23 predmeta u upravnom postupku i upravnom sporu od kojih je 21 preneseno iz ranijih godina, a 2 su zaprimljena u izvještajnom periodu, 11 predmeta su rješenja dok su 12 i kao nezavršena preneseni su u 2026. godinu.*

## **OSTALI PREDMETI („R“)**

*Ostali predmeti pod oznakom „R“, odnose se na izradu pojedinačnih informacija iz nadležnosti Pravobranilaštva, podnošenje imovinsko-pravnih zahtjeva u krivičnim postupcima protiv lica koja su izvršenjem krivičnog djela oštetili Budžet Kantona, prijedlozi za uknjižbu imovinskih prava, izjašnjenja Pravobranilaštva po podnesenim prijavama zbog neizvršenja pravosnažnih presuda, razne prepiske između Pravobranilaštva i subjekata čije interese Pravobranilaštvo zastupa ili subjekata koji se pismeno obraćaju Pravobranilaštvu po raznim pravnim pitanjima i dr.*

*Iz ove grupacije predmeta u 2025. godini evidentirano je u radu 295 predmet, od kojih je 216 okončano, 79 predmeta je preneseno u 2026. godinu.*

*Također veliki broj predmeta iz ovog upisnika, 48 predmeta odnosi se na korespondenciju sa osnovnim i srednjim školama, koje se odnose na pružanje stručne pomoći u rješavanju imovinsko-pravnih pitanja, tužbi i drugim stvarima u kojima Kantonalno pravobranilaštvo nema aktivnu legitimaciju i ne vrši zastupanje škola.*

*Također iz ove grupe predmeta radilo se na dostavi odgovara na poslanička pitanja, koja često nisu u nadležnosti ovog organa u smislu davanja potrebnih informacija, imajući u vidu pravni položaj Kantonalnog pravobranilaštva kao zakonskog zastupnika Kantona. Dalje, pružanje resornim ministarstvima određenih stručnih pomoći koja se ne mogu podvesti pod pravna mišljenja a tiču se ugovora o koncesiji, ugovora o prodaji stana na kojem postoji stanarsko pravo i sl.*

*Također, iz ovog upisnika Pravobranilaštvo je imalo obavezu podnošenja imovinsko-pravnih zahtjeva u krivičnim postupcima u kojima je povređena imovina ili imovinsko-pravni interes kantona, ukupno je podneseno 4 imovinsko-pravna zahtjeva.*

## **III PREVENTIVNA DJELATNOST PRAVOBRANILAŠTVA**

*Preventivna djelatnost Pravobranilaštva usmjerena je na sprječavanje nastanka povrede imovinskih prava subjekata, čije interese Pravobranilaštvo zastupa, odnosno na smanjenje vrste i obima tih povreda, zatim na sporazumno rješavanje spornih imovinsko-pravnih odnosa, kad je to moguće i pravno osnovano.*

*Pravobranilaštvo preduzima i druge preventivne radnje i mjere koje utiču na smanjenje štetnih posljedica po državnu imovinu, izbjegavanje nepotrebnih sudskih postupaka i troškova, te bržeg ostvarivanja nespornih prava subjekta kojeg zastupa.*

*U okviru preventivnog djelovanja, Pravobranilaštvo daje pravna mišljenja organima i tijelima Kantona po pitanju korištenja i raspolaganja državnom imovinom, pruža stručnu pomoć organima i tijelima Kantona čije interese zastupa u rješavanju imovinsko-pravnih*

pitanja, kao i drugih subjekata kada je to u interesu Kantona, predlaže nadležnim organima poduzimanje određenih pravnih radnji u cilju zaštite državne imovine, te saraduje sa kantonalnim i općinskim tijelima u rješavanju imovinsko-pravnih pitanja.

U skladu sa članom 13. Zakona o pravobranilaštvu, kantonalni organi i organizacije čije imovinsko-pravne interese Pravobranilaštvo zastupa, dužna su da u poslovima pravnog prometa prije zaključenja pravnog posla, pribave mišljenje Pravobranilaštva, ali u onim ugovorima u kojima se pribavljaju stvari ili raspolaže stvarima, odnosno materijalnim (vlasničkim) pravima u vlasništvu Kantona. Pravobranilaštvo u svom radu pruža stručnu pomoć shodno gore citiranoj odredbi svim subjektima koji dostavljaju zahtjeve za davanje mišljenja koja nisu obuhvaćena navedenom odredbom, u kojem slučaju davanjem eventualne stručne pomoći nadležnost Pravobranilaštva je iscrpljena.

### **Pravna mišljenja i stručna pomoć**

U 2025. godini Pravobranilaštvo je imalo zastupljene sve navedene oblike preventivnog djelovanja, od kojih su najzastupljeniji davanje pravnih mišljenja (oznaka „M”), te upućivanje opomena za dobrovoljno ispunjenje obaveza za koje su Pravobranilaštvu upućeni prijedlozi za podnošenje tužbi ili prijedlozi za izvršenje od nadležnih kantonalnih organa.

U izvještajnom periodu Pravobranilaštvo je u radu imalo 170 zahtjeva za davanje pravnih mišljenja, od kojih je 59 zahtjeva preneseno iz prethodne godine, a 111 zaprimljeno u 2025. godini a rješeno je 110 predmeta.

Ukupno je dato 110 pravnih mišljenja koja se odnose na mišljenja po ugovorima (kupoprodajni ugovori, ugovori o koncesiji, ugovori o građenju, ugovori o raznim vrstama usluga, ugovori o zakupu, ugovori o javnoj nabavci i dr.), a preko 150 usmenih mišljenja o kojima se ne vodi poseban upisnik a odnose se na druga pravna pitanja iz različitih pravnih oblasti (imovinsko-pravna pitanja, radno pravo, naknada štete, obligaciona prava mogućnosti sklapanja sudskih i van sudskih nagodbi iz osnova sudskih presuda, te s tim u vezi pitanje redoslijeda naplate potraživanja i dr.).

U okviru preventivnog djelovanja, Pravobranilaštvo kontinuirano saraduje sa nadležnim kantonalnim ministarstvima, sudovima i tužilaštvima, kao i sa općinskim i kantonalnim pravobranilaštvima sa područja Federacije Bosne i Hercegovine u cilju usaglašavanja stajališta o određenim pravnim pitanjima i što efikasnije zaštite imovinskih interesa Kantona.

## **IV. POSLOVI VEZANI ZA RAD PRAVOBRANILAŠTVA**

U okviru poslova vezanih za rad Pravobranilaštva, najčešći su poslovi izrade raznih rješenja o pravima iz radnog odnosa zaposlenika u Pravobranilaštvu (rješenja o ocjeni namještenika i državnog službenika, o korištenju godišnjeg odmora, te drugim pravima iz radnog odnosa), uvjerenja izdata o podacima iz službene evidencije Pravobranilaštva, izrada općih akata Pravobranilaštva, naročito donošenje Pravilnika o unutrašnjoj organizaciji i njegovim usklađivanjem sa pozitivnim propisima i nadležnostima Pravobranilaštva te informacije i izvještaji o radu Pravobranilaštva.

Iz ove grupacije predmeta („Up“) u radu je bilo 127 predmeta, od čega je 45 preneseno iz prethodne godine, 82 predmet je zaveden u izvještajnom periodu, 83 predmeta su okončana u 2025. godini, a 44 predmeta su prenesena u narednu godinu.

I u izvještajnom periodu provodimo postupak arhiviranja bezvrijedne arhivske građe (BRG) koji je proveden u saradnji sa Arhivom Federacije Bosne i Hercegovine, u skladu sa pozitivnim propisima koji uređuju arhiviranje uopće. Obzirom na provedeni postupak arhiviranja BRG-e, u Kantonalnom pravobranilaštvu dalje provodimo postupak arhiviranja shodno propisima koji to regulišu, ali istovremeno i navodimo potrebu boljeg i adekvatnijeg uređenja priručne arhive, na čemu se kontinuirano radi, nabavkom adekvatnih arhivskih polica, potrebne obuke namještenika shodno Zakonu o arhivu, odnosno pohađanje obaveznog seminara i polaganje arhivističkog ispita upisničara kojim je to dodatna obaveza.

## **V SISTEMATIZACIJA RADNIH MJESTA**

Unutrašnja organizacija Pravobranilaštva uređena je Pravilnikom o unutrašnjoj organizaciji Pravobranilaštva Zeničko-dobojskog kantona („Službene novine Zeničko-dobojskog kantona“, broj: 15/25).

Poslovi iz djelokruga Pravobranilaštva Zeničko-dobojskog kantona vrše se u okviru sljedećih organizacionih jedinica:

- a) Odjeljenje nosilaca pravobranilačke funkcije
- b) Odjeljenje za upravu i administrativne poslove.

a) Odjeljenje nosilaca pravobranilačke funkcije vrši poslove na osnovu Ustava BiH, Ustava FBiH, Ustava Zeničko-dobojskog kantona, zakona i drugih propisa i općih akata donijetih u skladu sa odgovarajućom zakonodavnom regulativom, u skladu sa nadležnostima iz Zakona o pravobranilaštvu (poslovi zaštite imovine i imovinskih interesa Kantona i njegovih organa, kantonalnih organa uprave, kantonalnih upravnih organizacija i stručnih službi i drugih institucija čiji je osnivač Kanton), te također vrši i druge poslove na osnovu Zakona o pravobranilaštvu.

b) Odjeljenje za upravu, opšte, tehničke i administrativne poslove organizuje i izvršava poslove u cilju što potpunijeg i efikasnijeg izvršavanja osnovne djelatnosti Pravobranilaštva, te izvršavanje ostalih prava i obaveza Pravobranilaštva utvrđenim odgovarajućim zakonskim propisima (izrada normativnih akata, izrada budžeta), poslovi iz radnog odnosa uposlenih, (godišnji odmori, plaćeno odsustvo i druga prava), poslovi pisarnice (prijem i otprema pošte) vodi upisnike, ažurira spise, arhiva predmeta, poslovi AOP (automatska obrada podataka), obrada i priprema predmeta, finansijsko računovodstveno poslovanje, rad sa strankama i drugih poslova po naređenju Pravobranilaštva koji doprinose efikasnijem radu Pravobranilaštva.

U skladu sa Pravilnikom o unutrašnjoj organizaciji Pravobranilaštva Zeničko-dobojskog kantona, u Pravobranilaštvu je sistematizovano 13 radnih mjesta, od čega Pravobranilac i četiri (4) zamjenika Pravobranilaštva, tri (3) državna službenika i pet (5) namještenika.

Od navedenih sistematizovanih radnih mjesta, u izvještajnom periodu u Pravobranilaštvu je popunjeno 9 pozicija, od čega: pravobranilac, dva zamjenika, jedan stručni saradnik i 4 namještenika, i jedan pomoćni radnik, dakle 4 pozicije su nepopunjene u izvještajnom periodu, što se uveliko odražava na rad kako smo to gore i obrazložili.

*U izvještajnom periodu i to u drugoj polovini kalendarske godine u Kantonalno pravobranilaštvo uposlen je jedan državni službenik, (dok je postojeći sporazumno raskinuo radni odnos), jedan namještenik i jedan pomoćni radnik.*

*Pravilnikom o unutrašnjoj organizaciji, predviđen je broj radnih mjesta, prije svega stručnih saradnika, pripravnika ili volontera i namještenika, a prema stvarno ukazanim potrebama, očekujemo u narednom periodu i popunjavanje istih. U tom smislu, predviđeno je tri stručna saradnika, čiji opis poslova je prije svega pomaganje u radu pravobranioca i zamjenika kao i samostalan rad na izvršnom referatu, koji je po svom obimu i najzastupljeniji.*

*Imenovani Pravobranilac je ranije bio Zamjenik pravobranioca u ovom Pravobranilaštvu, čijim odlaskom 2020. godine je pozicija zamjenika upražnjena, radi čega smo pokrenuli, već drugi puta u trajanju prvog mandata, proceduru imenovanja zamjenika pravobranioca, kako bi se rad mogao nesmetano obavljati u skladu iz Zakonom o pravobranilaštvu i citiranim pravilnikom. U tom smislu Pravobranilaštvo je u izvještajnom periodu pokrenulo proceduru za popunu upražnjenog radnom mjesta, Zamjenika kantonalnog pravobranioca, ali je iz pozatih razloga, odn. donošenjem Odluke vlade o moratoriju na upošljavanje nevedeni postupak obustavljen. S time u vezi Pravobranilaštvo je iznova pokrenulo proceduru, nadležno Ministarstvo je provelo propisanu proceduru i dostavilo Vladi Zeničko-dobojskog kantona koja procedura u faktičkom smislu nije dovršena u periodu za koji se daje izvještaj.*

*Međutim, u izvještajnom periodu navedena pozicija nije popunjena, što se uveliko odražava na sam rad imajući u vidu obim poslova iz nadležnosti Pravobranilaštva.*

*Dalje, sistematizovanje namještenika ekonomske struke zaduženog za materijalno knjigovodstvo i poslove upisnika je bilo također nužno. Imajući u vidu da Pravobranilaštvo od svog osnivanja nije imalo mogućnost uposlenja namještenika te stručne sprema a obim poslova iz nadležnosti Pravobranilaštva se uvećao te je neophodno da te stručne poslove obavlja jedan namješteni ekonomske struke, kako bi se izbjegla ne ažurnost, propusti i nekvalitetno obavljanje poslova bez stručnog lica ili angažovanje uposlenika po drugom osnovu.*

*Dakle, kako smo to gore naveli sredinom 2025. godine, izvršen je prijem namještanika ekonomske struke čija je osnovna zadaća materijalno knjigovodstvo ali uslijed ukazane potrebe ima obavezu i obavljati poslove upisničara čime smo uveliko postali efikasniji u obavljanju zakonom propisanih finansijsko -knjigovodstvenih obaveza koji su sve složeniji i zahtijevaju maksimalnu stručnost.*

*Također, Pravilnikom su predviđeni i pripravnici u pravom smislu te riječi, kako je to regulisano u Općinskim sudovima ali i određenim Pravobranilaštvima, jer smatramo da u ovom organu samo angažovanje pripravnika za obavljanje pripravnčkog staža može dati očekivane rezultate u smislu samostalnog osposobljavanja pripravnika za samostalan rad, polaganje pravosudnog ispita ili ispita općeg znanja te da Pravobranilaštvo upravo pruža takve uslove za osobe koje prvi puta zasnivaju radni odnos. U izvještaju za period 2024. godinu, u svome planu smo ovu aktivnost najavili ali u ovom izvještajnom periodu istu nismo pokretali imajući u vidu da smo prioritarno bili angažovani na popuni radnih mjesta prema Pravilniku o unutrašnjoj organizaciji.*

*Iz dosadašnje prakse, kad je u pitanju volontiranje, shodno o Zakonu o volontiranju, kao i Zakonu o radu, smatrali smo da, jedna godina volontiranja i nije dovoljna da bi se postigao cilj kojem težimo, a to je priprema za polaganje potrebnog ispita kao i samostalan rad. Naravno, i dalje smo voljni da se angažuju volonteri, ukoliko to bude alternativa za pripravnike, iako smatramo da finansijska sredstava ne smiju i nisu u ovakvom slučaju jedini*

uslov. Pravobranilaštvo svakako u svom finansijskom planu predviđa potrebna sredstva za sva buduća upošljavanja.

Prema tome, smatramo da će angažiranje pripravnika ili volontera imati pozitivan uticaj, kako na rad u jednostavnijim i manje složenim pravnim stvarima a s druge strane to daje mogućnost da poslije završenog pripraničkog staža, pripravnici ili volonteri budu osposobljeni za rad na složenijim pravnim poslovima a čime bi Pravobranilaštvo dalo svoj doprinos u segmentu društvene odgovornosti.

Pravobranilaštvo je tokom izvještajne godine imalo visok broj ulazne i izlazne pošte, odnosno obim poslova i zadataka koje je ovo Pravobranilaštvo obnašalo u protekloj godini, posebno ističući da Pravobranilaštvo ima određen broj sistematizovanih, a nepopunjenih radnih mjesta, te da je jedan od zamjenika pravobranioca bio odsutan radi bolovanja, kao i da jedini stručni saradnik radio do polovine godine radi prestanka radnog odnosa u Kantonalnom pravobranilaštvu.

## **VI OCJENA STANJA I POSTIGNUTI REZULTATI**

Analizom ukupnog stanja i uzimajući u obzir aktivnosti ovog Pravobranilaštva na poslovima zaštite imovine i imovinskih interesa Kantona, iz ovog Izvještaja može se utvrditi, da je Pravobranilaštvo i u 2025. godini, kako zastupanjem pred sudovima i drugim organima, tako i kroz davanje prethodnog pravnog mišljenja obavljanja drugih poslova iz okvira nadležnosti, te pružajući pravnu pomoć, pa i dalje uslijed očitog ne srazmjera u broju predmeta naspram broja nosilaca pravobranilačke funkcije (Pravobranilac i 2 zamjenika pravobranioca) i obavljanja svojih zadataka u takvim uslovima, kvalitetno i sa velikim uspjehom obnašalo svoju funkciju, ostvarujući zapažene rezultate.

Smatramo da je ovo Pravobranilaštvo u izvještajnom periodu, kao i prethodnih godina, krajnje profesionalno i uspješno obavljalo poslove zaštite imovine i imovinskih interesa. Pored priliva novih i prisustva veoma složenih predmeta iz ranijih godina a koji zahtijevaju poseban pristup, vrijeme za proučavanje činjenične i pravne situacije, izuzetno širokog dijapazona djelovanja ovog organa i kontinuiranog proširivanja nadležnosti Pravobranilaštva drugim propisima, svi poslovi su se u izvještajnom periodu obavljali ažurno i blagovremeno, stoga smatramo da je ovaj organ opravdavao svoju funkciju.

## **VII. MATERIJALNO-TEHNIČKA OPREMLJENOST PRAVOBRANILAŠTVA**

U pogledu materijalne opremljenosti, Kantonalno pravobranilaštvo radi u poslovnim prostorijama izgrađenim 70-tih godina prošlog vijeka, koje je potrebno u cijelosti renovirati iz razloga što postoji realna opasnost od nastanka štete od instalacija koje nisu dostatne, što zbog dotrajalosti što zbog nepostojanja uopće, da udovolje potrebama normalnog funkcionisanja i upotrebe stalnih sredstava kojim radimo. Poslovne prostorije su adekvatne i namjenski predviđene za Kantonalno pravobranilaštvo, koje po svojoj strukturi i površini svakako odgovaraju ovom organu, ali je iste potrebno modernizirati u skladu sa vremenom sve radi racionalnijeg i ekonomičnijeg korištenja.

Stanje službenih prostorija je dotrajalo da nisu dovoljna manja ulaganja jer je potrebno izmijeniti podove, stolariju, toalete, da bi i izgled kancelarija Pravobranilaštva dao potreban dignitet ovoj instituciji, a pravobranilac, zamjenici pravobranioca i ostali uposlenici konačno

*dobili zadovoljavajući radni prostor, potpunu materijalnu opremljenost i samim tim optimalne uslove za efikasan rad. Pravobranilaštvo je u izvještajnom periodu, shodno mogućostima, provelo i okončalo potrebne procedure nabavke namještaja kao i arhivskih polica, kontinuirano krećenje i zamjena dotrajalih itisona, određene vanjske stolarije ali i dalje ostaje problem neophodnih radova na samim poslovnim prostorijama u građevinskom smislu. Međutim, za navedeno nisu stvorene formalno-pravne pretpostavke koje su zbog nedostatka dokumentacije predmet postupka pred nadležnim sudom. Također, javljaju se i problemi da električnom energijom i instalacijama uopće, koje aktivnosti će mo nastojati rješavati ali kako je općepoznato da službene prostorije ne koristi samo Kantonalno pravobranilaštvo što uveliko otežava postupanje u formalno-pravnom smislu prema subjektima pružaocima usluga.*

*Dalje, Pravobranilaštvo je u saradnji sa druga dva organa koja su smještena u poslovnim prostorijama, nastojala prema nadležnoj Službi za zajedničke poslove riješiti pitanje elementarne sigurnosti shodno odredbama Zakona o zaštiti od požara i vatrogastvu, ali nismo naišli na očekivanu stručnu pomoć nadležne službe a kako smo to naveli, vrlo je neefikasno s formalno pravne strane ali i finansijske, istupanje Pravobranilaštva kao i druga dva organa, u cilju rješavanja tih problema. Prema tome, provođenje zakonom propisanih mjera u cilju zaštite na radu, zaštite od požara i sl. Pravobranilaštvo nije u mogućnosti provoditi iz objektivnih, gore navedenih razloga što predstavlja stvarni rizik od štete, kako za uposlene tako i za materijalno-tehnička sredstva.*

*Pravobranilaštvo u svom planiranju potrebnih sredstva za tekuće namjene, kao i namjene javne nabave potrebnih stalnih sredstava ima potpuno razumijevanje prilikom donošenja budžeta kroz opredjeljivanje i dodjelu traženih sredstava, jer su ona nužna i optimalna za navedene namjene a u odnosu na značaj, kao i postignute rezultate u pogledu punjenja budžeta od strane Pravobranilaštva.*

*Značaj Pravobranilaštva u pitanju zaštite interesa kantona, kako u pravnim stvarima u kojim ima pasivnu, tako i u onim u kojim ima aktivnu ulogu u postupcima te zaštite a što se vidi iz ovog izvještaja kao i ranijih kao prilog toj nepobitnoj činjenici a to se ogleda u ostvarenju konkretnog prihoda u budžet Kantona kroz postupke izvršenja gdje se Pravobranilaštvo pojavljuje kao zakonski zastupnik ali i sprečavanju rashoda iz budžeta u postupcima u kojima je Kanton tuženi.*

*Dalje navodimo, a u prilog gore rečenom, da je budžet ovog organa minimalan ali isti uspoređujući sa ostvarenim prihodom, kako direktnim tako i indirektnim, je dovoljan razlog da se Pravobranilaštvu da značaj koji mu pripada, kako u funkcionalnom tako i u materijalno-tehničkom, kadrovskom i svakom drugom obliku.*

*U tom smislu očekujemo da će se pristupiti renoviranju službenih prostorija u kojim je smješten ovaj organ, iako sredstva u budžetu za 2025. godinu nisu opredjeljena za te namjene jer Pravobranilaštvo nije bilo u poziciji da predloži zahtjev prilikom donošenja budžeta, ali se kroz rebalans mogu stvoriti pretpostavke za taj naš zahtjev. Postupak upisa vlasništva nad predmetnim prostorijama je u toku, jer je neizvjesno do kad će isti trajati, a stanje u funkcionalnom smislu otežava rad i funkcionisanje Pravobranilaštva. Otklanjanjem tih formalno-pravnih pretpostavki, stvorit će se mogućost poduzimanja pravnih i faktičkih radnji u ostvarenju ovog zahtjeva.*

## VIII IZVJEŠTAJ O JAVNIM NABAVKAMA

Pravobranilaštvo Zeničko-dobojskog kantona u 2025. godini provodilo je javne nabavke u skladu sa Zakonom o javnim nabavkama (SI, novine BiH br.39/14 i 59/22). Tom prilikom ugovoreni organ provodio je postupke Direktnog sporazuma u skladu sa članom 87. i 90. Zakona o javnim nabavkama i Pravilnikom o postupku direktnog sporazuma Pravobranilaštvo Zeničko-dobojskog kantona vodeći računa o sredstvima koja su mu odobrena u Budžetu. Član 87. Zakona o javnim nabavkama definiše da je direktni sporazum jedan od tzv. postupaka za dodjelu ugovora male vrijednosti. Ugovorni organ provodi postupak direktnog sporazuma za nabavku robe, usluga ili radova čija je procijenjena vrijednost jednaka ili manja od iznosa od 6.000 KM bez poreza na dodanu vrijednost. Pravilnikom o postupku direktnog sporazuma Kantonalnog pravobranilaštva je propisana procedura za provođenje postupka nabavke putem direktnog sporazuma i definisano da se direktni sporazum smatra zaključenim:

- kod nabavki čija je vrijednost do 1.000 KM prilaganjem računa ili druge odgovarajuće dokumentacije;
- kod nabavki čija je vrijednost veća od 1.000 KM ugovorni organ je dužan zaključiti ugovor.

Direktni sporazum je članom 90. Zakona o javnim nabavkama definisan kao postupak u kojem ugovorni organ nakon ispitivanja tržišta traži pismeno prijedlog cijene ili ponudu od jednog ili više ponuđača i pregovara ili prihvata tu cijenu, kao uslov za konačan sporazum. Izvještajem su obuhvaćene aktivnosti prema predmetu nabavke, vrsti postupka, vrijednosti ugovora, izbora dobavljača za dodjelu ugovora (ekonomski najpovoljnija ponuda).

Kantonalno pravobranilaštvo je u izvještajnom periodu provelo i izvršilo ukupno četiri javne nabavke, nabavku usluga popravke instalacija u mokrom čvoru, postavljanje dijela dotajale stolarije, nabavka kancelarijskog namještaja i kancelarijskih fotelja u ukupnoj vrijednosti od 16.000,00 KM.

## IX OSNOVNI ZADACI I PROGRAMSKA ORIJENTACIJA PRAVOBRANILAŠTVA U 2025. GODINI

U ostvarivanju principa ustavnosti i zakonitosti i ostvarivanju funkcija i zadataka koji proizlaze iz Zakona o pravobranilaštvu i drugih zakonskih propisa, aktivnosti Kantonalnog pravobranilaštva Zenica će i u narednom periodu biti usmjerene na:

- Poduzimanju mjera i aktivnosti radi pravne zaštite imovine i imovinskih interesa Kantona,
- Afirmaciji svih vidova preventivne djelatnosti Pravobranilaštva, kao što su sporazumno rješavanje spornih odnosa,
- Kontinuiranom praćenju pojava i problema vezanih za primjenu zakona u praksi, te iniciranje izmjene istih, putem nadležnih institucija,
- Organizovanju radnih dogovora sa ministarstvima i drugim organima u cilju što stručnijeg i efikasnijeg rada i postizanja boljih rezultata u zaštiti imovine Kantona,
- Ostvarenju saradnje sa federalnim i državnim organima i pravobranilaštvima na svim nivoima radi ujednačavanja prakse i zauzimanja stavova po pravnim pitanjima vezanim za

*primjenu zakonskih i drugih propisa, saradnju sa pravosudnim organima, organima uprave i drugim pravnim subjektima u cilju ostvarenja funkcije koje proizilaze iz naše nadležnosti.*

- Ukazivanju Skupštini i Vladi Kantona na uočene pojave i probleme koji ugrožavaju i narušavaju imovinu Kantona, a do kojih saznanja bude dolazilo kroz rad na predmetima, kao i kroz podatke i obavještenja koja dostavljaju državni organi, preduzeća i druga pravna lica, te u okviru svoje nadležnosti, davati prijedloge za sprječavanje istih,*
- Edukaciji nosilaca pravobranilačke funkcije i drugih uposlenika putem seminara, savjetovanja, kurseva, praćenja sudske prakse i nove zakonske regulative,*
- Obezbjedenju kadrovskih (popuna upražnjenih pozicija zamjenika Pravobranioca, stručnih saradnika) i materijalno-tehničkih uslova za postizanje veće ažurnosti i efikasnosti u rješavanju predmeta iz nadležnosti Pravobranilaštva,*
- Sačinjavanje Izvještaja o radu Kantonalnog pravobranilaštva za izvještajnu godinu,*
- Redovno vršenje poslova na izradi raznih podnesaka koji se odnose na parnični, izvršni, vanparnični, upravni postupak kao i upravni spor pred nadležnim sudovima i drugim organima i tijelima koji odlučuju o pravima i obavezama Kantona, postupanje u zemljišno-knjižnim stvarima kod podnošenja zahtjeva za upis Kantona, izjavljivanje pravnih lijekova u tim postupcima i sl.,*
- Preduzimanje mjera i aktivnosti na utvrđivanju mogućnosti sporazumnog rješavanja spornih odnosa, a u već nastalim sporovima nastojati najefikasnije otkloniti sve štetne posljedice ili iste umanjiti,*
- Preventivno djelovati kroz sugestije i pravna mišljenja subjektima koje zastupa kako bi se otklonili svi pravni osnovi za eventualno potraživanje štete ili drugog prava,*
- Obavezno učešće Pravobranilaštva u postupcima izrade Općih akata kojima se regulišu imovinsko-pravni odnosi,*
- Praćenje i proučavanje društvenih odnosa koji su važni za ostvarivanje funkcije Pravobranilaštva,*
- Uredno obavljati administrativno-tehničke poslove iz djelokruga ovog organa, poslovi pisarnice, uredno voditi propisane upisnike i druge poslove i zadatke,*
- Raditi na izradi internih akta, pravilnika koji nisu doneseni ili usklađeni za zakonima koji su u nadležnosti Pravobranilaštva,*
- Obezbijediti potrebna sredstva za nabavku stalnih sredstva, donijeti potrebne materijalno - pravne osnove za arhiviranje predmeta shodno Zakonu o arhivskoj građi Zeničko-dobojskog kantona i drugih propisa koji regulišu postupanje sa arhivskom građom (predmetima i spisima),*
- Saradnja sa Arhivom Federacije BiH u postupku arhiviranja i uništavanja bezvrijedne arhivske građe,*
- Edukovanje namještenika koji su određeni za vršenje arhivskog poslovanja,*
- Rad na ažuriranju u rješavanju predmeta iz ranijih godina i pokretanja odgovarajućih postupaka,*

- *Racionalno koristiti sredstva za rad te se pridržavati i drugih mjera štednje.*
- *Nastojanja van sudskog rješavanja novih sporova iz radno- pravnih odnosa koji se odnose na utuživanje za isplate razlike doprinosa iz razlika plaća koje su bile predmet ranijih postupaka i isplata, o čemu je Zeničko-dobojski kanton upoznat radi čega očekujemo da se aktivno uključi u postupak obzirom da će navedene tužbe dodatno opteretiti budžet Kantona,*
- *Aktivno učešće u postupcima zaključenja van sudskih nagodbi kroz opredjeljena sredstva u budžetu za 2026.godinu*
- *Praćenje ostvarivanja ustavnosti i zakonitosti kao i o svim uočenim pojavama eventualnog kršenja pozitivnih propisa obavijestiti Skupštinu i Vladu Kantona.*



*Kantonalni pravobranilac*

*Seđad Kliko*

**PRILOG:**

- ***Tabela 1 – pregled prenesenih, zaprimljenih i riješenih predmeta po referatima u 2025. godini***
- ***Tabela 2 – prikaz vrijednosti sporova u parničnim postupcima u izvještajnom periodu***
- ***Tabela 3 – prikaz vrijednosti naplaćenih iznosa u izvršnim postupcima u izvještajnom periodu***

Oznaka spisa	Broj spisa prenesenih iz 2024. godine	Broj spisa zaprimljenih u 2025. godini	Ukupan broj spisa u radu u 2025. godini	Broj okončanih spisa u 2025. godini	Broj prenesenih spisa u 2026. godinu
"P" (parnični)	315	151	466	34	432
"I" (izvršni)	3.967	157	4.124	212	3.912
"Ist" (izvršni-sudska taksa)	8.615	1.947	10.562	442	10.120
"U" (upravni)	21	2	23	11	12
"M" (mišljenja)	59	111	170	110	60
"R" (razno)	80	215	295	216	79
"Up" (interni)	45	82	127	83	44
<b>Ukupno</b>	<b>13.102</b>	<b>2.665</b>	<b>15.767</b>	<b>1.108</b>	<b>14.659</b>

- Tabela 1 – pregled prenesenih, zaprimljenih i riješenih predmeta po referatima u 2025. god.

Ukupna vrijednost svih parničnih sporova u radu		33.434.167,30KM	
Ukupna vrijednost u sporovima u kojima je Kanton tužitelj		Ukupna vrijednost u sporovima u kojima je Kanton tuženi	
10.546.421,95 KM		22.887.745,35 KM	
Vrijednost podnesenih tužbi u izvještajnom periodu	Vrijednost pravosnažno okončanih tužbi u izvještajnom periodu	Vrijednost zaprimljenih tužbi protiv Kantona	Vrijednost pravosnažno okončanih tužbi protiv Kantona
2.638.218,65 KM	92.460,16 KM	3.213.741,53 KM	1.099.511,67 KM
Vrijednost u cijelosti usvojenih tužbi Kantona protiv trećih lica			
92.460,33 KM			
		Vrijednost povučenih tužbi	
		385.768,70 Km	
		Dosuđeno	Odbijeno
		464.089,85 KM	246.601,60 KM

Tabela 2 – prikaz vrijednosti sporova u parničnim postupcima u izvještajnom periodu

Naplaćeni iznosa glavnice	Iznosa naplaćenih troškova	Ukupno ostvareni prihod
176.476,00 KM.	34.485,00 KM	210.934,00 KM

Tabela 3 – prikaz vrijednosti naplaćenih iznosa u izvršnim postupcima u izvještajnom periodu